



KOTAVUSA VIRDA


KOTAVAFA VIRDA VESTASA VA TAMAVA IS ARAYEEM MU AYIKEEM

Balemeaksat ke 2023

6^e otuk

Kotava, tela tamefa golerava
Va ina kosmac !!





IZVA IS ARAYA


Tula, kelu ke Tolteca sane

Zabduyuna az vilayana gan lorik

Tula kelu ke Tolteca gindaxo lente Mexico juntak koe ref Hidalgo galdolk tigrir. Minaf ref grupes sok nover da roruyet da Tula tir debak ke Tollan vundafa widava (Xo dem edgarda kan Azteca ava), i xo torigino gu diolaca gan Azteca saneik, lize berma tiyid kum aka. Nuve, Motecuhzoma Xocoyotzin Azteca gindik folkiyir volambik ke Tolteca gazik.

Rawopafa joxara razdad da Tula moni 900^e RGJ bak radimpulukugal zo zabduyur ise va vegeduropafa gundaca dum Teotihuacán atoeyer. Tula gan gelbesik to rotir zo vegeduyur, i gan gelbesik otceyes il Teotihuacán ba inafa teyvilara bak 750.

Gijafa leon dam Teotihuacán, Tula soe tir woeckesa widavapa stujeyesa va gindaxo ruldaso vas jontiko radimpulukugalafo Maya xo, tulon vas Chichén Itzá.



Tela lozolonafa cugexa ke Tula yoltkiron gu B relida zo gruper. Bata relida-dopewa pu Quetzalcoatl (Bruxakirafe Perake) zo tarizayar. Inafe levedre tid yun-keyene gu fetin-



te kaatoese va djuprodilfus tukrunol isu yaxol ik kiiz vumbes va takra, i gu leca muxasa va gejanorlik ke Tolteca sane. Dye kabdue relida, omafa rebava dem moeon balumaks kaatoes va Quetzalcoatl ton Lorik va Suka tigrir.

Sedme remtrakura ke Azteca saneik, Tula radimi vilara va Teotihuacán gan Quetzalcoatl zo zabduyur viele in do jontik gertik isu jiomik gonotceyer. Inafe gadikye, i Mixcoatl mialalorik (Perake ke Rujod) ape tiyir taneik kizes va Tolteca felira. Soe tire Tolteca saneik va dugeem ke lorik gu tel ke ayik belcon vangluyayad ise va yon vund ke Teotihuacán vanikatcuyud enide va intaf vexeem di mwedayad numen atayera va Quetzalcoatl to koe Tula di waltodayar. Quetzalcoatl tiyir zolonaf maneke Ce Acatl Topiltzin sersik ke Tula, i zabdusik va widava is belcon ironokaf okilik, gu Quetzalcoatl va int yoltayar.

Kotavaf Izvugalayak [-800 – -700 : Amerika]

Sinka is Anameda — Irubara is Vegedura — Ckane is Gandura — Yamba is Miga

CKANE TA BURMERA

Divulafa stabrega ke araya ke Poverty Point (Mississippi, -1500 - -700) tid konaka decitoya kuritcaxama. Nyofayana ton konak decemoy amidaf tazuk, va burmera va cek ke letafa sarma mekidason noveyed. Sinka is lava koon zo plekuyud, aze kuritcaxama tuckerayana kan tey di zo komimayad.



Kuritcaxa ta burmera, Louisiana

Mona ke Adena araya, Kentucky, Amerika



IVAMUFA MONA

Sanelia ke Adena araya (-1000 - -100) koe Ohio is vema va ivamufa mona xakolafa gu 4 ik 10 m- vegeduyud. Rebava tiyid dreon gu licayan xuf geroteem ape giskis va tronkanafa bopica. Kepaita tiyir feykorafa isen teyxo iste mona tigiyr.

Lent Volmezayana az anteyayana

Bak 1156, Azteca saneik va Tula dilfuyud aze kalvilayad, arse kiren ina tiyir wupesa jowawidava lentuon rokallanina gan dilfura ik faspasa ke yon alizmonaf grelt. Ta tumalyara va lana fastafa vilasa tegira, widava zo kalanteyayar isen cugexa zo kidayad. Azteca saneik dakteyed da tamef meld wal Tezcatlipoca (Vikizasa Elza) intaf adomtaf lorik is Quetzalcoatl al dilizeyer.

Sedme vunda, Quetzalcoatl tiyir kaelaf loraf korobutik. Inafa karuca va djolera va walikrara is abidara va soyutafi goni is blodaceem ke gertapik rupteyer. Voxen Tezcatlipoca tcedeyer da in ulipiyir maneke ve akoleyer aze va listaf Xochiquetzal mbi atoeyer, i va tilikya ke baerdaf tresenikeem, nume tison izkaf walikrayar. Nope bati tegi, Quetzalcoatl va int gu teyxonuka di zo lanzayar, numen batcoba va firdera va Tula di tumalyayar. Takra ke Quetzalcoatl mal teyka ticniyir aze va kelt artniyir lize di kadayar Wuluz gazdabitej. Azon gu redus lorik zo dasugdayar nume lanviele dimpitir, divrokatason va



Yon rawaks is
cugexa
ke Tula

Tezcatlipoca is tenatason va felira ke Azteca sane va Istefa Amerika.



Kipi ke Tula mea zo kojoxar ; ant istefa cugexa ko-tron zo vestayad : Anteyayana Berma is B Relida is Rebava dem Perake is Viputixopo. Bata kolna bak vilara va debak gan Azteca tolgenisik zo kidapayad. Gijotafi ki kum ckoda ke B relida zo deswayar. Jontik tawarn men disukeyen aname idjaxo moe welmotap tigid neke icde tiyis lum ke widava bazecked.



*Nuyafa ewava male internetxo :
<https://commons.wikimedia.org>*

Internetxo : **Kotava : langue, littérature / ava, suteroteem**

<https://kotava1837481.wordpress.com/2018/11/29/izvugalayak-800-700-amerika/>

ARKTIKAF TAWOLDA

Tawoldaxa ke opelaf martig koe arktikafa gola ke Lentefa Amerika zo awid, xuton gu araya dem « arktikafa xekama ». Bata tawolda ke Denbigh (yoltkirafa gu Denbigh Evilma koe Alaska) dive bata gola me di amuzeweyer, nelkon kiren bat tcabanesik bureson va gamiafa is rantafa tawoldaxa me rodelaniyid.

Tawoldaki, Denbigh,
Alaska



Yon mard is kudjot kum
kerafa tabila, Louisiana, Amerika

NIRANAF MARD

Nekiyin gan abrotcifa is pinto-tafa nirasa kobara, bat mard tazukon gu mard is kudjot tid lana lolistafa yambaxa ke araya ke Poverty Point (Louisiana is Mississippi). Sinaf rilaf ugot (wamba is tabila ikz-) kan ilafa kaza zo urlickeyed.



I.



Bata klokara tiyir ke wawaf Makar gonillaniyis ko brigafa coyunta ta baspexa va bonoleem, i ke mil Makar tis « sosagonden faliskik » milinde urima somotaver.

Xo lize in kobliyr tir yoltkirafo gu Tcalgan, i widama tambafa is palsewesa koe taiga aalxo. Ambik ke Makar va aalxopo dun gejaypayad abdida va opranafi tawaki lajudivzaetawayad, i va olgalicurama ware anamplekuna gan amnaxo dum mekolanisa is volnafa rebava. Voxen me gribudaweyed. Gleida is nakki is dentkseway koe sentama zo madayad ; omafa skiderna kotrafa gu vikiz darkayanon awiyid ; tere, milinde nilt grianamplekur nume va cenera dakter, pune biot moe ventotsama iste monaxo zo kolnayar : Tcalgan vanpiyir widapa.

Voxen milugale ambik ke Makar va aalxopo gejayad ise kan tey is kufra vangabeyed, miv loloon dun tugovitaweyed. Yerumason va yakutikya, va ava is lideem ke warzafa vuwuca radayad. Adala ke rossiafa zaavapa lemeyed, griawiyid.

Neken, Makar va intafa xanta me vulkur meie da sotir nazbeik ke bato tawavo. Koe Tcalgan al kobliyr ise banlize bliyr, ise banlize djupokawalkeyer. Tiyir oklapaf gu vedeyot nume va patectolik gu « yakutikaj » dile askipeyer, neke soye icde lida ik blirinda gu batmil yakutik meinde zo somewalwiyr. Abicon is dugajon rossiauvuyur ; gu almaxa va int vageyer, va torbas staz vukuyur ; inafe vieleafe rude gitiyr dem tanoy dibuk do yeladaxa ; bak joraviel ok cugunaykafa katecta, dile gu jeyen fest va int fariuyur voxe battode va kotak tigris moe azega fixayar. Tiyir deksapaf gu jaftollakira. Todon gu akolera va diwik gigukoeyer ; bantan, wetce ropera, va in talgadweson is betinde zatcapason ipeyer ; batcoba ta grelandera va akolege koe alto ke Makar numu yatesira.

Makar dum xaltik kobayar, copon bliyr, aeleson is fenteson. Kas va betcoba trakuyur, vaxe duskafa cowega is yeladaxa ?

Gue, va arcoba trakuyur.

Gubeon, cugviele tiyir grijaf, pune boreyer. « Mana bliraja tir minafa, Lorik !~ kaliyr ». Edeme dile va kotcoba djubuluyur aze « mo mefta » co laniyr. Banlize co di zavzagiyr, me ziason mei faytawason mei aalbalieson mei impadimason va inta, me glefason va olk kal magatcewa. Va glogakiwara anton co di adaeyer. Toka bata mefta tir ? Toklize tigris ? In me tagelton grupeyer. Anton grupeyer da, taneon bata sokrulder, ise konlize sotigir, tolke sumon, en sumon eke dace toyon jiomaik somekosmar. Ison banlize dodera va koayka dere zo somediner.

Voxen kotviele in me tiyir grijaf, pune bata rieta jovleyed. Rotir battode welidayar abickase va mana mafelapafa mefta co di kosmayar. Grijuca va in loeke tustuvayar. Dosteyer da jontikkase

va rotafa mefta volsu tela kiewafa co di trasiyir. « Battode tití buktik, ~ kaliyir. » Neke va batcoba wan klokayar ise nubagiyir kore me skuyur ; ede van bata vartafa mefta me mallaniyir, pune ape ant batdume vol rodefaskiyir ; tataraf boniasik va lavajebaj bidzen gu olaxatoa keskeon levdoleyed, i gu olaxa laumasa va nouca vox dere tanamusisa valem azega is akolesisa is tupoiskasa.

II

Darekeon. To direviel ke kristnazbalaviel tir, ise Makar gruper da dareviel tir ke jorapa. Bat goaspil va djumera va ulirama guon nekir. Soe in tir gabentaf is burdaf ; va mek erbolc dadir isen denteksa riwe tir mekak. Makar pu tatarik ke wida isu dolekik ixam danupur. Neken to direvielon tir jorapa ! In me rokobatar ! Toktan int vanpitiir ede mekane rotugrijaweter ? Bata trakura tuvolkalar. Lorik, mana blira tir tela inafa ! Va tokcoba ? Dace bak bat viel, ba jorapa ke fentugal, in va vodka lavajeb vas tanoy tiraccek me ronovulitir !

Ve rietenyer. Ranyar aze va sollipanafa sona myotxa kodiskir. Kurenik, i reltkiraf godjik popaf lidam evakaf is gruperses va geakifa trakura ke Makar, va ware gire xialara diepiller.

— Tokliz lanil, oretlikaj ? To ant gire va lavajeb djumulil ?

— Va int stival !! Va tanoy tirac anton lusteté isen eldeon belcon ulitit.

Makar va inafa epita fopon dendar eke guazya yolkar. Ina rovon miabuditawer. Ax ayikyafa takra ! Grupecker da Makar gimocoer, arse, neke va mempera ke tolongafa santara vol rodefacagir.

Viele Makar koe kusk tigur, bam va guazaf Lisanka okol dapnarir, kan yinaxada kal impadimot star aze toz vansorkar. Moion, bonol is felisik div kusk tigid. Banliz Lisanka vukir aze takakadir ise va Makar klokeckes disukeson koerur. Bantel, impason va taltef dirkey, va okol art wida vankabur.

Banlize skidernama zo inkeyer. Tituon, milinde malu betara skiderna, vikiz ke keldega va kelt rontackon titstir, i batafaf is udegaf vikiz pases va fentaf bitejeem is yozdasa sizunta ke tael. Rem gaapafi opraki teyka va kunoy daavaf is tacukaf tazuk narid. Amlitarapa gazar.

Irubasik batlize tid diveik. Sinafo vo tolke ileon tigur. Toka suka va sin batliz al star ? Toka diwedara ko bata tamba al mimar ? Makar me gruper ise sir. Voxen va batyon korik djukanobar, i va korik somesavejes is gidolebamas.

Va skiderna kolanir, aze vere va keldega vanlanir. Va fentepes nubeem van tey sotcer.

— Tca ! ~ kalir, muxatason eke fentepé.

Diveik koe skiderna tigid. Raki moe azega anteyawer voxe va koafira va meka kobara zanudar. Tan ayik, senyes moe ilava, vikizar. Vikizmaserk va art divstid, numen va derda klokeson kakdisuker, i va derda liz wana ke inyona trakura ape vwepapon tanameyawed. Ar, debanyes kabdue keldega, va kunoya baponafa conya bourgasa va trokewesa inta kobrakon nyaser.

— Kiavá ! ~ Makar kalir, toz funenon gan amlit.

KLOKARA KE MAKAR

Tire, va telyona nigera vulesa va takra ke batyon diveik me gruper, i va telyon namiks resielon divmodes iste oria, i va telyona ewava awisa reme olaxavikiz ok koe rintasa is betawesa yozdara ke tey. Ostik, kas int me dwir ?

Yik debanyes kabdue keldega takamadar, va spupiafa disukera numekagrupesa van Makar vodjur, aze takabotcer dumedede va dustulesa trakura co djumaloyar, aze va rova bulur, blion ranyason.

— Ax, kiavá, kiavá, va Makar ! Tagelton artlanil. Kas va yeladaxa do cin djumulil ?

Makar gu dragera zo puver.

— Va yeladaxa ? ~ kalir. ~ Ae, kiewaxe, nik, ae !

Va myotxa oriwon divdiskir, va myotaf gom deswar, pesteson lotrabiangaf kir batinde basvageyen, aze viele va teyka ke lujaf yeld mimayan ko boluringa wir, pune van yik rwodeper.

— Va win albá, arse ! Albá, alpapá... Nume mielon me lajukenibé...

Diveik toz disuker aze va pirafa kicegara ben kutceem nedir.

— Ax, albal ? ~ kalir. ~ Va tokcoba olegal ?

Makar zo vrinar.

— Va arienta dadí, ~ bazer. ~ Tokdume al diepilel ?... Re, va yeladaxa fu ulí, azen pulvití.

Larde to diveik va yeladaxa al firvid, pune Makar va rude djulaumasir.

— Kas va solzakski dadic ? Albacká... ~ kalir.

— Volgue.

— Ae, loxe, ~ Makar nepaleson kalir, ~ xabe, arviele... ~ gin kalir. ~ Arviele, mex ?

— Gue.

Makar malyedar da diveik va solzakski batvielu puon danud. Va malimaxura va mana boza somevulkur.

Arti tanoy bartiv, Makar koe duskaf impadimot gire debanyer. Va tanoy varaf rubl talolk re digir. Va inta vas aluboy edavacek ika guntackasa kreda su govedafur. Ae al kalvogar da va bata erba gu lavajeb me ixalatar, icle revielon. Neken inafa acafa is tanafa xialara tir mana unera, vere. Voxen xabe ? Puvemola va beta wegayera ke jiluca belkesir. Dace vulkur da viele fu tir grijaf, pune kurenik durulon di kalalier.

— Tokliz lakil, Makar ? ~ diveik iegar, edje okol ke Makar van tatarikafa gasta talton bankriler lodame ronton kabdulanir.

— Tpru... -u !... Tpru... -u !... Vukil !! Man okolaj !... Tokliz bankriler ? ~ Makar diviegar, kan kom akles da batcoba tir golde dal in.

Makar va taltef dirkey impapar ise va Lisanka kan ronef faigoyon luladar.

Gruf bonol, aultbotceson dum culimeson, van stegena nia ipegason ongir. Fure, ten dwedason moe nolda, impadimot kabdu tuveli ke tatarikaf kusk vukir.

III

Konak okol vaniksantuyun poke tuveli tigid. Va yakutaf ontinaf milost bured.

Renga tir vwepafa. Tipafa dakela ke dugajafa olaxa koeon belkesir. Vaf vikizrujod azenter, vion gelavan gan keldegimpara. Yakutik woras kabdue azega is moe starka debanyed. Moe azega bilaga tukotrayan gu lavajeb tigid. Konaka lospa liwud. Kota gexata tir kerafa, furovepesa. Liwusik va liwa volokon disuked. Dun kaldisuked. Ede kontan va talolk divucomar, pune vere dimon di koucomar, mekeson is tumusason. Koe alava, kurdanyes moe baplaki, grijaf yakutik viklar. Va teniskafa cwaga dankagar. Wevdaf is iepes mam va inafa bergotca divstid. Kunon tolkalir da direviel titir jorapa numen resielon tir grijaf.

Makar va erba sotcer. Ikaon va kotraf tirac mbi zilir. Kev ast licar aze va int kerujon tubumar. Banlize va bilagacek az bilagacek puon gimar ise azazon vere fixar. Lavajeb tir pirakaf. Katecton gu jora, gu lava vas icle apu zo bidzer, voxen olaxa me zo kimar. Bat kot artcek, Makar abicedje ilgaeler ise ziadger.

Fure alnitcawer. Int dere mo bapla luber, ton meem aname badeeem liz va tugamiawesa taka aykar. Vucaf is akoydaf mam oltavaf gu tel ke pokeik va inafa larida divvawad. Dankagar da direviel tir jorapa ise ta ulira va inta vas aluboy edavacek su ixalar.

Wori koe renga korik dun tid loote jontik. Warzaf worasik dun kolanid, artlakison ko wida ta blikera ise miledje ulitison va lavajeb ke tatarik. Tilik rabater da uma runda tori anelikeem mea fu tir. Ranyar aze, va tigusikeem vamoo azega waldisuker. Ita va Makar apcanyes koe ilava isu yakutik kozwir.

Va yakutik vanlanir, ben bergok konubar aze divon mimar. Moion van Makar lanir. Tarkason va inafa dotikafa kira, tatarik vanyer loon fimkaf. Tuvelfenkupur aze nugapason va dey popon abdumimar eke kimtaf Makar divon luber, ton pez ko noldaki.

Me rokalí ede in gan bata yoromafa askipera zo kantar. Nolda va inaf lesay tuoprar ise va ewazalt konir. Arti sugarapa, van Lisanka wavdon dimlanir.

Klokara ke Makar, ke Vladimir Korolenko (1^{-eafa} zixa is toza ; daza tisa koe diref otuk)

Klokara ke Makar, berpotam (1885) ke Vladimir Korolenko rossiaf suterotik
 Xanto : *Сон Макара*, rossiavon, kalkotavayano gan Mixail Kostov, 2008.
 Dotay : Kotavaxak dem Suterot.

Robelin banliz : <https://fr.scribd.com/doc/305871177/Klokara-ke-Makar-ke-Vladimir-Korolenko>




Thomas Cole (1801-1848) ~ Amerikaf lingesik

Koe jotaf amerikaf vedey kuranira va redura va yambafa tegira meruptesa va Europa exaksawer. Ilamkaf is ware ketaf patectoy ke Warzafa Tamava va meropuskena koswavasa klita pu yambik firvid. Thomas Cole tiyir taneaf lingesik koaykayas va patectoymartig aptaf gu Amerika.

Jotaf kolamasik grutes va lingera

Thomas Cole ba 1^e ke toleaksat ke 1809 koe Bolton valenttalte Engla koblrir. Jotaf vanpir ravesik dene gwetiasik ise gu zovdara va int kotaver. Bak 1818 inafa yasa va Tanarasokeem kolamar aze koe Ohio soka inkewer. Gadikye va rosiaxeme digir numen Thomas deneon toldon kobar. Azon vanpir avlotcaf deltusik ise va Ohio widavawidavon exuler voxen kiewatca me sokir.

Yasa bak 1823 ko Pittsburgh divsoker, voxen Thomas ko Philadelphia kalion mallakir lize gu yambacultim va int kobemar. Bata tazukara va tukiewara va inafe rotakafe ckane nover. Va patectoyafa lingera dere kosmar. Bak 1825 va yasa koinkeweyesa koe New York kazokever.



Taneafa kiewatca

Bak idulugal ke 1825, Cole va Hudson krant is Catskill fluvor lente New Yok widava exuler. Catskills tir eem dem cuisafa kusaruxafa venta, nume vanpir gelukaxo ke Cole. Koe Catskill wida mali 1827 va int parmon inker. Bal yona gozara, Cole va patectoy kan ogalt lorder aze ta puntatrutca koe lingexo di malsaver. Bata kobavesa nuva va nuyucapa nover. Cole va grupecken patectoy sagon rotarkar oke va gestan wiray roskur.

Inafa taneafa trutca kadime ralpoda ke William Coleman nevadolesik zo wonad. Dulapera ke John Trumbull gan fitc ke Thomas Cole zo sumpar nume va Kaaterskill Falls stoya ika 25 dollar talolk bak 1826 luster. John Trumbull (1756-1843) tir izvalingesik kaatoeyes va yona dalafa bifa ke geja ta volruptesuca az balemoy rebavaf lingeks ta Capitol cugexa ke Washington. Mana isterera nover da Cole va turestaf korobik ke yambafa tamava di kakever. Trumbull va ine pu Robert Gilmor dotayepesik (1774-1848) is Daniel Wadsworth (1771-1848) tulon atoer. Bristune gan Trumbull djumabduaskis va patectoyafa yamba ordon amerikafa, banvielu kulaf kumaskisik isu yambusik pu Thomas Cole belon jafad. To Hudson River School serna di vanblrir.

Sposaf lingesik

Wali 1829 is 1832, Cole koe Europa koyar lize va tcilaxepe ke London az Paris az Firenze az Roma az Napoli. Denon, koe London va geltreva ke John Constable (1776-1837) is abdueva ke William Turner (1775-1851) norlaf abdifisik va liteva kosmar. Koe Paris, va yon pulukaf patectoy ke Nicolas Poussin (1594-1665) is Claude Lorrain (1600-1682) kosmar. [...]



Recela 5 : Totsuka

Recela 5 : Totsuka tir teveafa gweta ke sposaf gwetak vergumveltkiraf gu 53 recela ke Tōkaidō vawa (*Tokaidō Gojūsan-tsugi no uchi*), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo (re Tokyo) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.

Hiroshige va varaf gwetak dem 53 recela ke zalor zovdayar. Bata gweta (*Ukiyo-e tazuk*) tir lumkirafa gu 37 × 25 cm- (ton *Oban* breviz). Tir alubeafa ke enk ise va greelt koe Totsuka kaatoer.

Greelt ke Totsuka

Larde greelt ke Totsuka arte mon tanoy koyas afizcek mali Nihonbashi za tigiyir, pune tiyir giltafo tildexo mu koyasik is recelapa isen va toloye zalorsokexe (*honjin*) digiyir.

Gweta ke Hiroshige va koyasik titlanis va okol is kolanitis va yeladaxe nedir. Koe radimazenta za kum inta vamoo kuksama van teca widama star.



Xantofa piskura : 1833-1834 gan Hōeidō



Piskura : Gyosho enk, 1841-1844 gan Ezaki



Piskura : Reisho enk, 1847-1852 gan Marusei



Utagawa Hiroshige lingsik
(1797-1858)

Varaf teliz tigus koe Kotava Xadola dene Wikipedia.

~ Banliz [https://avk.wikipedia.org/wiki/Recela_5_:Totsuka_\(gweta\)](https://avk.wikipedia.org/wiki/Recela_5_:Totsuka_(gweta))



TAMAVA IS TAWAVOPA

Saint Kilda, lobumaf ewaleem ke Skota

57° naris laksiwak ! Arte 65 km- talte Lewis ewala isu Harris isu Barra koe lentefa Atlantika welfa, Saint Kilda ewala tigr, i tel lobumaf ewaleem ke Skota.

Banlize grocelon Outer Hebrides tursia, durefa sukara moe basrodawesa welfa va lane lae ke ara tamava gu bat savsaf tculk al nekir. Soe yona yasa va ebava moe bat plabaf is meluvedaf siday al vegeud, rumeik vanmiae werdap al vefad, isen tolonga koe erodiskafe raporxe va sint al renad, i koe raporxeje re zavzase anton rawaks.

Gue, blira koe Saint Kilda al krulder, kali icle 1930 viele ironokaf irubasikeem va ewala al djubulur aze mo tadava va int al inker, duxayanon gan mana kaikkobasa kruldera koe lugavaf gropeem dure remsetikes da Ayik va runda koe bat ewaleem me rodadiyir.



1) Rawaks ke wida.

2) Afigasuteks va irubasik bak 1886.
Losavsafa conyuta ke ayikafa kerelera
va ewala tid ke Abdiizvugal.

Kontesa izva ke irubasikeem ke Saint Kilda

Coba tir merofolina voxen bata ewala ke Skota remi loon toloya decitda trenon zo irubasir, mali lyekotugal kali idulugal ke 1930.

Stabrega ke taneaf abdiizvaf irubasik ke Saint Kilda ewaleem anton zo katrasiyid, isen tanefa suteyena miwara va bat siday tid ke 13^{eafa} decemda. Bak 1266 teni Viking firday, Saint Kilda pu MacLeod ke Harris is Dunvegan staba zo xaadar, kali 1931.

Taneafa nega va blira ke irubasikeem ke Saint Kilda tir gan Martin Martin worayas va ewaleem bak 1697. Kosmayana blirinda va vunda ke bat ewaleem arte tamava toz suteyer.

Tanaf patectoy ke Saint Kilda koe tamava

Saint Kilda ewaleem koe Skota va lowoes patectoy ke varafa Britana ape firvir. Kotcoba anton tir ton gurafa kiria is fansilesisa koliava koe yunkexa bagaliafa gu Jurassic Park sorda, reduyuna gan bato briaxo fikon lubeso ko Atlantika welfa. Moe bat siday gomefansilet larde kotcoba batlize sotir volpreksafa. Ontinuk vas 430 m- tir Conachair mefta, isen lodontinafa kiria ke Britana vas 400 m- batlize tigid, numen wiray tid naris betlizu disuket.

Voxen, ticu Hirta, disukera gan Boreraay ewalama



tigisa arte 2 km- jontikviele zo tuzatar. Droles tum dem dalafa ewalama is toloya dilafa birawafenza dere tisa tela lodontinafa ke Britana : Stac Lee (172 m-) is Stac An Armin (196 m-). Banlize rujod va pistok bengid, lize yono decitoyo dakido irubaso batakon besad. Mali ticawaltara kali titawaltara, itaskara sol baton sumef siday me rotir.

Male wida, wira va Boreray soe me rotir ede va portafa tickelda kal xed tice

savsafa monaja vas 200 m- me moolanit. Voxen kaike ceda is piluda, Dun rega nuvelar da zo kabzayar ise va yona decitoya aspumta bravar ise dere skebur.

Male bira, Saint Kilda ewaleem va entacukaf krilt basitalkar. Tite spurnafa raporka vamoetalana gan yoni decitoyi zveri dure iesi num besasi va ompe ke dagaf runteem, itabudera vol rotir kiren va gijarotiuca ke bat patectoy en djukunarit. Nume va tirodafa evodara ke taneaf budik batliz stuvon lapiyis lokiewon gildat, i ke budik kosmas da korik moe bat bumapaf siday sume tamava bliyid.

Ewaleem va celemoyi zveri bravar voxe va lana baleminiafa katca dere dikir, i va katca taneon kakevena ba artlapira. Mal tel tec etolaj, va lana apta guazafa gu Warzaf Raporugal kevlanit, i va Soay namulol. Bat govitaf namulol, gubeon pinaf is alnaf mali 3000 tanda moe bat meluvedaf siday mepomanon gan ayik sotowad, i moe siday lize zivotc ik kiria ik fent va in me cened. Dace inafa bayna imwugalon miv luber. In tir vudenses voxen oc me pokarson zo govanlanir kiren inafa gadikya battode di rotiskedar. Mon 1500 bat listaf govitlam moe Saint Kilda re tigid.



Gurafe kirife lae ke Saint Kilda

Wetce sidayaf dunol, Saint Kilda va ara pilkafa apta bravar, i va Saint Kilda gweldipol. Bat dunol tir pwertaf loon dam tadavaf milkatcik ise moe ewala jontikote tir. Ugale ewala wan tiyir saneliakirafa, pune lizukafa kwafa slakolafa apta dere tiyir voxe kaiki mallapira ke ironokaf irubasik me di mobliyir kire va gubefa sinka me trasiyir. Ison, wira va spedol impavantas va raporka ta koawaltara tir meriafa disukexa.

Voxen sposuca ke Saint Kilda valey bat merofolin patectoyeem tir birazveri vas datafa ota, i zveri begamasi moe bat bumaf ewaleem.

60 000 dakido ke ewaleem va balemeaca ke tamavafa katcafa sanelia tadled. Boreray ewalama tir fuda ke bati batakafi is blafotafi zveripi dem wiltade vas cugon 1.80 m-, isen kelt nutuebeltawer viele sini vamoe taka ton laonesis zveritumars anamtalad.



Wiks va vurjama is abica witafa kolna

TELIZ

2^e bu : Tula kelu ke Tolteca sane
2^e bu : Kotavaf Izvugalayak
4^e bu : Klokara ke Makar, berpotam
8^e bu : Thomas Cole, lingsik
9^e bu : Recela 5 : Totsuka
10^e bu : Saint Kilda ewaleem
12^e bu : Liwombura
12^e bu : Kuda ke Aisopos

Kotavusa virda

Virda kotavon sanelayana, nuyon is faston
romalvajana is rorubiana is rotamzilina.
Ickriluyun rokeem. PAG / DE.
Internetxo : www.europalingua.eu/KotavusaVirda
Bu : www.europalingua.eu/KotavusaVirda/6-e_otuk_04-2023

Sanegara : Balemeaksat ke 2023. 6^e otuk.

Yunkeks is ewava : ewaveem abugaf gu roka ok
nuyon rotamuzen ok rictayan gan digisik.

LIWOMBURA

Tula va liwa ke lana ombaliwa watson gu alto.
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/09/02/un-jeu-de-7-familles-en-kotava-2/>


2

Loma
TAKA

ALTO

FR
oeil, yeux

Ita / iteem



Iteem : toloya ita va witca sodid ise va
gralombera va afi noved. Ayafa ita va
solwira va tazuk is uka sonover. Gedruca
ke itinda koe sulemaf bliind tir zolonafa.

gexata - ita - pez - art - oblaka - usuk

Deaxol is astol

Ayik va deaxol is astol sinkar. Okie deaxol va astol tudjumasar kire in zo gigestursur. In kalir :
« Wal gotacena gatcewa is yon goburen porn, rinafa blira tir teniskafa olyastewera. » Aze
pirdar da in va kilandruca jidjar ise ta tildera ko fe ins luber. Va pirdara tarkar, ins luber nume
va varafo alto lupur. Feliik va sulemkurmik tagar, va wayot tori bakanik erur. Sulemkurmik va
koplekuks ke deaxolaf riz savsuter ; bat wayot va in dimon tugalesitir. Acum deaxol ta
fraskera va astol di zo vikear.

Bettan kev artan nyagon levtiur, pune sovanpir taneaf askisik va intafa volkalucar.

Kuda ke Aisopos, -VI^{-eafa} decemda (kalkotavaks gan Yurani Andergan)